

Terenga 5: Hōtaka 1 – Te Toai Pū

He Mihi

Tēnei te waka o Ako te auraki mai nei ki ōna taketakenga, ki te whare o Whakaata Māori, ki konei tuia anō ai te taukaea o te aroha ki te reo e tameme nuitia nei e tātou. Nau mai.

Hei Mahi Whakarongo

He reo rōreka tō te tamaiti e waiata ana i te waiata e whai ake nei, hei whakanui i te reo Māori. I tupu ia i roto i te mātotorutanga o te reo, i roto anō hoki i ngā ringa morimori o ngā kaiako me te hāpori o Mana Tamariki.

Anei ngā pātai hei whakautu mā koutou:

- 1) I ahu mai te reo i whea?
- 2) E rangatira ai te reo, me aha?
- 3) E waiatahia ana tēnei waiata ki a wai?

Kia whakarongo ake tātou ki te whetū maiangi, ki a Tawaroa Kawana.

He Whakamārama

Mena e rua, e toru, e hia rānei ngā whakamārama mō te tangata, mō te wāhi, mō te mea kotahi, me toai i te pū e whakataki ana i aua mea. Ko te kōrero hei whakatauiria i tēnei āhuatanga, ko te karakia whakakapi e mōhio whānuitia ana, e pēnei ana te kōrerotia:


- I. Kia tau ki a tātou katoa te atawhai **o** tō tātou Ariki, **a** Ihu Karaiti, me te aroha o te Atua, me te whiwhingatahitanga ki te wairua tapu, ake, ake, āmine.

I runga i ngā ture wetereo e hāngai ana ki te toai pū, me pēnei kē te rere o te karakia:

- II. Kia tau ki a tātou katoa te atawhai **o** tō tātou Ariki, **o** Ihu Karaiti, me te aroha o te Atua, me te whiwhingatahitanga ki te wairua tapu, ake, ake, āmine.

He Mahi Ī-papa

Whakatikahia te hapa kei runga i te Īpapa:



Hei Mahi

Whakamāoritā ēnei rerenga e whai ake nei:

1. Today, the Minister of Māori Affairs, Pita Sharples, tabled the new Māori Language Strategy in Parliament.
2. According to my teacher, Piripi Kereopa, I need to extend my knowledge of idioms.
3. I must buy a present for my niece, Heeni.

Whakautu:

Mahi Ī-papa: Nā taku pāpā, nā Mautī i whakairo tēnā. / Nā taku pāpā, nā Mautī tēnā i whakairo.

1. I te rā nei, i tāpaetia e te Minita mō ngā Take Māori, e Pita Sharples, te Rautaki Reo Māori hou ki te Pāremata.
2. E ai ki taku kaiako, ki a Piripi Kereopa, me whakawhānui au i taku mōhio ki ngā kiwaha.
3. Me hoko taonga au mā taku irāmutu, mā Heeni.